

BRADNEY, Syr JOSEPH ALFRED ('Achydd Glan Troddi'; 1859 - 1933), hanesydd sir Fynwy

Enw: Joseph Alfred Bradney
Ffugenw: Achydd Glan Troddi
Dyddiad geni: 1859
Dyddiad marw: 1933
Priod: Florence Bradney (née Prothero)
Priod: Rosa Bradney (née Jenkins)
Plentyn: Walter Bradney
Rhiant: Joseph C. Bradney
Rhyw: Gwryw
Galwedigaeth: hanesydd sir Fynwy
Maes gweithgaredd: Hanes a Diwylliant; Llenyddiaeth ac Ysgrifennu; Ysgolheictod ac leithoedd
Awdur: William Llewelyn Davies

Ganwyd 11 Ionawr 1859, yn unig fab Joseph C. Bradney, rheithor Greete, Swydd Amwythig. Cafodd ei addysg yn ysgol Harrow ac yng Ngholeg y Drindod, Caergrawnt, lle y graddiodd yn 1881. Bu cysylltiad rhyngddo â'r milisia ac â'r fyddin o 1882, pryd y'i ceir yn gapten ym milisia sir Fynwy, hyd ar ôl rhyfel 1914-8.

Gwasanaethodd ei wlad mewn lluo o gylchoedd; ar gyngor sir Mynwy, fel ynad heddwch, siryf, ac is-raglaw yn ei sir, yn aelod blaenllaw o gyngor Llyfrgell Genedlaethol Cymru a'r Amgueddfa Genedlaethol, yn aelod o'r Royal Commission on Ancient Monuments in Wales, o urdd S. John of Jerusalem, etc.

Eithr fel hanesydd sir Fynwy ac un a gyhoeddodd lawer o ddefnyddiau eraill at wasanaeth haneswyr y cofir am Bradney. Cyhoeddwyd rhan gyntaf ei *History of Monmouthshire* yn 1904, a rhan o'r bedwaredd gyfrol yn 1932, ond ni chafodd yr awdur fyw i orffen y gyfrol hon. Cyhoeddwyd cyfrol 5 o *History of Monmouthshire* (gol. Madeleine Grey) yn 1993.

Heblaw'r *History of Monmouthshire* fe gyhoeddodd Bradney lu o lyfrau ac erthyglau, megis: (a) *Genealogical Memoranda relating to the families of Hopkins of Llanfihangel Ystern Llewern, co. Monmouth, and Probyn of Newland, co. Gloucester* (1889); (b) *The Diary of Walter Powell* (1907); (c) *Acts of the Bishop of Llandaff* (1908); (d) *Llyfr Baglan* (1910); (e) *Hanes Llanffwyst* gan [Thomas Evan Watkins](#), ' Eiddil Ifor ' (1922); (f) *A Dissertation on Three Books* (1923); (g) *A History of the Free Grammar School in the Parish of Llantilio Crossenny* (1924); (h) *A Survey of the general history of the town of Newport and district* (1925); (i) *A Memorandum, being an attempt to give a chronology of the decay of the Welsh language in the Eastern part of the County of Monmouth* (1926). Cyhoeddodd hefyd *Noctes Flandricae* (Llundain), casgliad o gerddi a rhyddiaith a gyfansoddwyd gan mwyaf yn Fflandrys yn 1917. Ceir o leiaf ddau waith ganddo yn Lladin, sef *Carmina jocosa* (1916) a *Carmen* arall a gyfansoddodd yn 1923 pan gafodd radd D.Litt. Prifysgol Cymru. Copiodd a chyhoeddodd gofrestri eglwysi plwyfi Llantilio Crossenny a Phenrhos (1916), Llanbadog (1919), Llanddewi Rhydderch (1919), Caerwent a Llanfair Discoed (1920), a Grosmont (1920). Ysgrifennodd hefyd i gylchgrawn Cymdeithas Lyfryddol Cymru.

Daeth i'w ran, yn rhinwedd ei wasanaeth i'w wlad ac ysgolheictod ei gyhoeddiadau, lawer o anrhydeddau. Fe'i dyrchafwyd yn C.B. yn 1911, cafodd ei wneuthur yn farchog yn 1924, a chael gradd D.Litt. 'er anrhydedd' gan Brifysgol Cymru yn 1923. Bu'n briod ddwywaith, y tro cyntaf â Rosa (bu farw 1927), merch Edward Jenkins, Nantygroes, sir Faesyfed, a'r ail dro a Florence, merch Francis E. Prothero, Malpas Court. Medrai Gymraeg yn bur dda a pharhaodd i ysgrifennu Lladin hyd ei farw, 21 Gorffennaf 1933.

Awdur

Syr William Llewelyn Davies, (1887 - 1952)

Ffynonellau

Who's who?, 1933

NLW MSS 7561-7767

Miscellanea Genealogica et Heraldica (1868-1934), June 1924

Y Cymmrodor, xxxi

Transactions of the Woolhope Naturalists' Field Club, 1924

E. D. Jones, '[Sir Joseph Alfred Bradney \(D.W.B., 48\)](#)', *Cylchgrawn Llyfrgell Genedlaethol Cymru* 14 (1965-66), 114

Darllen Pellach

Archifau LIGC: [To the Electors of the County of Radnor... 1892](#)

Archifau LIGC: [To the Electors of Radnorshire. Unionist Song "Here's To Our Cause"](#)

Dolenni Ychwanegol

VIAF: [34528050](#)

Wikidata: [Q6281666](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

